

အုအုဟိဟိ အုအုဟိ
 ဂဇာဟု အုအုဟိ ဟိဟိဟိ



ဂဇာဟု ဟိဟိ
 အုအုဟိ ဟိဟိဟိ
 အုအုဟိ ဟိဟိဟိ

DAGING
BANTANG AWIG-AWIG
DESA ADAT BELONG

=====

MURDHA-CITTA

SARGA	I. ARAN LAN WEWIDANGAN DESA	1
SARGA	II. PATITIS LAN PAMIKUKUH	2
SARGA	III. SUKERTA TATA PAKRAMAN	3
	Palet 1 Indik Kerama	3
	Palet 2 Indik Perajuru Desa	8
	Palet 3 Indik Kulkul	12
	Palet 4 Indik Paruman	14
	Palet 5 Indik Druwen Desa	16
	Palet 6 Indik Sukerta Pamitegep	18
SARGA	IV. SUKERTA TATA AGAMA	25
	Palet 1 Indik Dewa Yadnya	25
	Palet 2 Indik Resi Yadnya	29
	Palet 3 Indik Pitra Yadnya	29
	Palet 4 Indik Manusa Yadnya	32
	Palet 5 Indik Butha Yadnya	33
	Palet 6 Indik Cuntaka lan Sengkernya	35
	Palet 7 Indik Sasaradan	37
SARGA	V. WICARA LAN PAMIDANDA	38
	Palet 1 Indik Pawiwahan	38
	Palet 2 Indik Nyapihan	42
	Palet 3 Indik Sentana	44
	Palet 4 Indik Warisan	46
SARGA	VI. WICARA LAN PAMIDANDA	48
	Palet 1 Indik Wicara	48
	Palet 2 Indik Pamidanda	49
SARGA	VII. PERAREM LAN PASWARA	50
SARGA	VIII. NGUWAH-NGUWAHIN AWIG-AWIG	52
SARGA	IX. PAMUPUT	53

MURDHA CITA

AUM, OM

Om Swastyastu, Om awighnamastu nama sidham,
 Putusing Peseban Krama Desa Adat Belong gumawe Awig-awig
 Desa Pekraman maka sepat siku-siku pameneh, wastu kasidha
 Prayojanan mami kabeh Prasama angidep mwah amagehaken kadi
 linging Awig-awig iki.

SARGA I

ARAN LAN WAWIDANGAN DESA

Pawos 1

- (1) Desa Adat Puniki mawasta Desa Adat Belong.
- (2) Jebar kakuwub wawidanganya mawates nyatur :
 - a. Sisi Wetan ring Desa Adat Jati;
 - b. Sisi Kulon ring Desa Adat Tebuana;
 - c. Sisi Lor Desa Adat Patas;
 - d. Sisi Kidul Desa Adat Bonjaka.
- (3) Desa Adat puniki kawangun antuk 32 paon karang ayahan
 Desa lan karang Gunakaya.
- (4) Sajawaning Desa sane munggah ring ajeng, wenten taler
 sane kawastanin Kerama Banjar, inggih punika sahaning
 wong Desane sane sampun majangkepan/marabian, taler
 patut makrama.
- (5) Kakuwub wawidangan Desane, manut dresta luwire :
 1. Papupulan karang paumahan, sinanggeh palemahan desa
 Pekeraman.
 2. Setra, Carik miwah Tegal ring kakuwub wawidangan
 Desa, sejabaning palemahan Desa Pekeraman manggeh
 telajakan Desa.

- (6) 1. Awig-Awig, Perarem miwah behanan paswaran Desane, manggeh kajejerang ring kakuwub wawidangan Desane sami.
2. Awig-Awig miwah perarem Subak ring telajakan Desane tan maren manggeh kainggilang.

SARGA II

PATITIS LAN PAMIKUKUH

Pawos 2

Desa Adat Belong puniki ngemanggehang pamikukuh minekadi :

1. Pancasila.
2. Undang-Undang Dasar 1945, pamekas pasal 18.
3. Peraturan Daerah Propinsi Dati I Bali No.06 tahun 1986
4. Tri Hita Karana, manut tatwa miwah sada cara Agama Hindhu.

Pawos 3

Patitis Desa Adat Belong luwire :

1. Mikukuhin miwah ngerajegang Sang Hyang Agama.
2. Nginggilang tata prawertine meagama.
3. Ngerajegang kasukertan Desa, saha pawongania sekala lawan niskala.
4. Ngerajegang tata sangaskaraning pawongan, pamekas sane ngiket pakulawargan.
5. Ngerajegang kasukertan seraja druwening Desa miwah druwening pawongania sami.

SARGA III
SUKERTA TATA PEKRAMAN

PALET 1

INDIK KRAMA

Pawos 4

1. Sane kabawos Kerama Desa, inggih punika kulawarga sane meagama Hindu sane ngamong Karang Desa miwah magenah jenek wiadin madunungan sajeroning palemahan DESA ADAT BELONG.
2. Sejaba punika sinanggeh tamiu.

Pawos 5

Kerama Desa Adat Belong puniki wenten 4 (petang) pawos luwire :

- (1) Kerama Ngarep, inggih punika kulawargane sane ngamong karang ayahan Desa.
- (2) Kerama Ngempi, inggih punika kulawarga sane tan ngamong karang ayahan Desa.
- (3) Kerama Balu, tegesnia kerama ngarep utawi kerama ngempi silih tunggil lanange utawi istrine sampun lampus.
- (4) Kerama Tapukan, inggih punika :
 1. Kerama sane durung antes ngayah katinggal olih yayah renania, gumantos antes ngayah.
 2. Kerama sane katiben gering, mewastu nenten meresidayang ngayah, gumentos waras. Sakemawon yan prade sang katiben pinungkan punika madruwe Oka utawi Pianak sane sampun antes ngayah, sang sungkan punika polih tetapukan wantah awarsa.

3. Kerama Tapukan mamungkul utawi nyibakin, yan sentanania sampun antes ngayah, sakemawon kantung masekolah, kekaninin pamopog manutin ungguhan lan perarem.

Pawos 6

Ngawit dados kerama Desa/Banjar Adat :

- (1) Mawiwit ngamongin karang ayahan Desa
- (2) Mawiwit Jumenek sajeroning palemahan Desa Adat Belong.
- (3) Melarapan antuk pawiwahan pretisentana (1) miwah (2) ring ajeng.
- (4) Sehanan warga Desa sane jumenek ring wewengkon Desa Adat, patut sainut ring kecaping Awig-Awig lan pararem sane sampun kamanggehang.

Pawos 7

Panemayan tedun makrama Desa/Banjar Adat :

- (1) Malarapan antuk pawiwahan kakawitin ring rahina : Anggara Kasih.
- (2) Malarapan antuk patilar rahayu saking warga Desa tiwosan, prade pacang jumenek patut risampun mewaneng 42 rahina saking atur supeksa ring Parajuru Desa Adat, Saha nawur penaub/pamopog manutin perarem, miwah sumanggup nganutin seurah-arih kecaping Awig-Awig lan perarem sane kamanggehang olih Kerama Desa.

Pawos 8

Sehanan Kerama Desa sami keni ayah sekadi ring sor:

- (1) Ayah ngarep saking kerama ngarep, keni ayah miwah pawedal mamungkul.
- (2) Ayah Ngempi saking kerama ngempi, keni ayah manut perarem miwah pawedal manut wiguna.
- (3) Ayah Tekel (pangrombo) saking kerama balu, keni ayah miwah pawedal manut pawongania, napike lanange utawi istrine sane lampus. Prade balu ngalintik, keni ayah nyibakin, sakemawon yan ayah lanang utawi istrine sane nenten wenten ngayahang, punika kakeninin pamopog manutin pararem. Yening balu punika ngempu, sang balu punika keni ayah mamungkul yan empu-empuane sampun antes ngayah.
- (4) Ayah roban saking kulawarga dandanan utawi roban sane sampun manggeh mayusa sakirang ipun 6 (nem) warsa, tur kapupulang soang-soang dados paseka-sekahan manut wigunania.
- (5) Prade rikalaning ngayah wenten sinalih tunggil kerama matilar sadereng puput karya, wenang kerama inucap keni pamindanda tanjeklaler wiadin tawinggaltarung manutin paswara.

Pawos 9

Kerama Desa kadadosang :

- (1) Mapawangkid utawi tan tedun ;

1. Rikala ngakerebin

- a. Piasan.
- b. Gedong/Meten.
- c. Bale Dangin
- d. Jineng/Kelumpu.

} Mapawangkid 2 Rahina.

2. Meyadnya sanistania anttuk banten Rosan, sasuwunipun tedunan apisan, sejawaning ring rahina Tumpek Wariga (Tumpek Pengarah), Galungan lan tumpek Kuningan.
 3. Piodalan ring Pamerajan/Sanggahnia selami tedunan apisan.
 4. Rikalaning nunas bawos (memasar) selaminia arahina.
 5. Rikalaning matepetin sungkan sane magenah ring dura Desa.
 6. Rikaling matepetin sungkan sajeroning paumahan, sesampun wenten kabebasan saking Prajuru.
 7. Rikalaning nganter anak sungkan.
 8. Rikalaning kesengan ring sang Rumawos
 9. Pacang ngemargiang utusan Desa/banjar sane mabuat, arahina sadereng memargi.
 10. Ngingsirang puri/umah selaminipun arahina.
- (2) Nyade utawi nyuksukin sane kawenangeng sasampun manggeh Deha Teruna utawi meresidayang nganutin kerama.
 - (3) Melaga utawi ngentosin ayah-ayahan antuk artha berana manut paetangan, menawita kajudi antuk sang maweng rat utawi sane mabuat lianan sesampun polih kabebasan saking I Kerama Desa.
 - (4) Agung Alit pamalagane inucap kaanutang ring pararem.
 - (5) Yan wenten silih tunggil Kerama sampun werda tur katah madruwe sentana, wenang I Kerama Desa nyudi silih tunggil sentanania mangda nyade/nyeledihin sang werde inucap.

Pawos 10

(1) Wusan dados Kerama Desa luwire :

1. Sangkaning pinunas ngeraga, menawi kesah kadura Desa utawi ngelangkungin segara.
2. Sangkaning kanorayang, duwaning sampun tan prasida ngesehin solah, maprawerti stata nguwig kecaping Awig-awig.

(2) Sang wusan makrama

1. Patut ngaturang karang ayahan ke Desa
2. Tan polih pah-pahan sekancan padruwean Desa.

Pawos 11

Sane kasinanggeh tamiu kapalih kedadosang kalih pawos :

(1) Sane megama Hindu :

1. Ngerawuhin pakulawargania sane wenten sajeroning Desa Adat Belong, arep mawirasa miwah ngaturang bakti ring kayangan sane wenten sajeroning Desa Adat Belong polih waneng wantah 42 rahina. Yan prade langkungan ring punika patut keni baya pacalang nangken ngesasih manutin perarem.

(2) Sane nenten megama Hindu, menawita :

Mawirasa utawi ngerereh karya, waluya kasinaggeh tamiu saha patut nginutin kecaping (1) ring ajeng.

Pawos 12

Swadharmaning Kerama Desa/banjar Adat miwah tamiu luwire :

(1) Kerama Desa/Banjar Adat :

1. Dreda atuwang ring Desa/banjar.
2. Tinut ring daging Awig-Awig, Perarem lan Paswaran Desa.

3. Tan maren ngutsahayang mangden Desa/Banjar wiadin jagate gemuh landuh kertha raharja.

(2) Tamiu :

1. Tinut ring tatiwak Desa ngupadi sukerta sekala.
2. Tan wenten tungkas ring sapemargin kertin Desane.

Pawos 13

Patuas wiadin Olih-olihan Kerama Desa/Banjar Adat :

- (1) Polih pasayuban Parajuru, ngemanggehang patitis Pawos
- (2) Nyarengin paruman Desa/Banjar Adat saha wenang mastikayang pamutus bebawos.

PALET 2

INDIK PRAJURU DESA

Pawos 14

- (1) Desa Adat Belong kaenter antuk Bendesa Adat.
- (2) Banjar Adat kaenter antuk Kelian Banjar Adat.
- (3) Bendesa lan Kelian patut mawiwit saking kerama ngarep, tan cedangga, tur uning ring aksara.
- (4) Bendesa Adat keadegang melarapan antuk pemilihan nyabran 5 (limang) warsa, sajawaning wenten parindik tiwos tur kangkat kapilih malih, miwah maduluran Dewa Saksi (mawinten) ring Pura Desa.
- (5) Kelihan Banjar Adat keangkep olih Kepala Dusun /Banjar, keadegang malarapan paingkup Kerama Banjar, Kepala Desa, miwah Camat manutin Undang-Undang, saha maduluran Dewa saksi (mawinten) ring Pura Dalem.

- (6) Sinoman utawi saya kemanggehang manut ririgan,
tur magentos nyabran ngesasih nangken
pasangkepan.

Pawos 15

- (1) Bendesa Adat kesanggra antuk :

1. Petajuh.
2. Penyarikan, pinaka juru surat.
3. Artha raksa, pinaka juru raksa jinah.
4. Kasinoman/Saya janggi, pinaka juru arah lan
ngewacak I Kerama Desa.

- (2) Kelihan Banjar Kesanggra antuk :

1. Penyarikan, pinaka juru surat
2. Artha raksa, pinaka juru raksa jinah.
3. Patajuh sane ngelaksanayang upakara yadnya.
4. Patajuh sane ngelaksanayang wewangunan
5. Sinoman/Saya janggi, pinaka juru arah lan ngewacak
I Kerama Banjar.
6. Pecalang, pinaka patelik.

- (3) Sajeroning ngenterang kasukertan niskala, Bendesa
Adat miwah Kelihan banjar patut nginggilang Pemangku,
Kubayan lan Penyarikan Pura.

Pawos 16

- (1) Swadharmaning Bendesa miwah Kelihan :

1. Ngelaksanayang/ngenterang daging Awig-Awig miwah
pararem Desa/banjar.
2. Ngenterang/ngetangang padruwean Desa/Banjar.

3. Nuntun/ngenterang kerama rawuhing warga Desa/Banjar ngupadi kasukertan sekala niskala anut patitis.
 4. Nuntun saha nyaksiang tatacara sangaskaraning kauripane mabuat sane ngilitang sulur pakulawargan.
 6. Maka duta Desa/Banjar matemuang bawos ring sapasira ugi.
- (2) Swadharmaning Penyarikan :
- Ngelaksanayang pailikitan miwah sareng ngenterang kerahajengan I Kerama Desa/Banjar sami.
- (3) Swadharmaning Pemangku :
1. Ngenterang pujawali ring Kahyangan manut gegambelan.
 2. Nitenin wiadin nuntun kesucian Kahyangan.
 3. Ngelaksanayang/ngenterang Yadnya, manut sepakoning Bendesa/Kelihan.
- (4) Swadharmaning Kubayan :
- Nuntun pemargin Agama/Adat lan Padewasan sajeroning Desa Adat ring sor :
1. Desa Adat Talepud.
 2. Desa Adat Tumbakasa.
 3. Desa Adat Bonjaka
 4. Desa Adat Belong
 5. Desa Adat Tebuana
 6. Desa Adat Sangkaduan
 7. Desa Adat Let
 8. Desa Adat Pakuseba.
 9. Desa Adat Taro Klod

- (5) Swadharmaning Saya/Sinoman
Ngelaksanayang sepakoning Parajuru.
- (6) Swadharmaning Pecalang
Maka patelik sukertan Desane.

Pawos 17

Sesanan Kubayan, Pemangku lan Penyarikan Pura :

- (1) Yan pacang ngewalat rabi, wenang ngaturang rumuhun
pawintenia ring Pura genahnia mawinten nguni,
tembenia wawu wenang ngewalat rabi, riurinia wenang
ngewana wasa atahun suwenia, irika malih ngawitin
mawinten sekadi upakarania nguni.
- (2) Ambek Dharma Sadu, suci nirmala, pageh ring sastra
utama.
- (3) Tan wenang pati pikul-pikulen, tan wenang kaungkulan
ring warung banijakarma, tan wenang umungguh ring
soring tetarub cemarayuda, tan wenang ajejuden, tan
wenang aparek ring saluwiring dusta, tan wenang anayub
upadrawaning cor, teka wenang Adewa Saksi.

Pawos 18

Yaning Parajuru nilar swadharma utawi sesana, keni
pamidanda nikel ring dosaning Kerama manut dudonan saha
kengin kawusang manut pararem.

Pawos 19

Tatacara ngelaksanayang swadharma muang sesana tan meren
keanutang ring Awig-awig, Pararem, Dresta miwah Paswaran
Desa muang Banjar.

Pawos 20

Parajuru kagentosin riantukan :

- (1) Seda/padem
- (2) Kanorayang dwaning iwang pamargi utawi nilar sesana.
- (3) Wit sangkaning pekayun rahayu patut sajeroning paruman tur kaingkupin antuk I Kerama Desa/Banjar.

Pawos 21

Patias utawi Olih-olihan Parajuru Desa luwire:

- (1) Luput saluwiring reramon.
- (2) Polih pangangkepan saluwiring duman.
- (3) Patias tewosan manutin perarem.

PALET 3

INDIK KULKUL

Pawos 22

- (1) Kukul ring Desa Adat Belong wenten 4 (petang) pawos :

1. Kukul Desa Adat
2. Kukul Banjar Adat
3. Kukul Subak
4. Kukul Pasekaha-sekahaan.

- (2) Tatepak kukul Banjar matewos-tewosan manut tatujon :

1. Tengeran ngayah : kalih tulud lambat
2. Tengeran ngamedalang rare : Tung2, Tung2, Tung2.
3. Tengeran wenten lampus : tung3, tung2.
4. Tengeran Nganten/pawarangan : Tung3, Tung3, Tung.
5. Tengeran umah puwun : Tung, Tung, Tung.....
(bulus)

6. Tengeran kemalingan : Tung3, Tung3, Tung3,..
(bulus)
7. Tengeran wenten jatma ngamuk : Tung2, Tung2,
Tung2, (bulus)
8. Tengeran nimbang rare : Kalih tulud lambat nunggu
limang (kelentungan).
9. Tengeran naur sewan listrik : Kalih tulud lambat,
nanggu 4 (petang) klentungan.
10. Tengeran ngurungang patedunan : Tigang klentungan
lambat.

(3) Tabuh tatepak kulkul Desa taler mateosan manuting
tatujon :

1. Tengeran Pujawali : Nungting rikalaning Ida Bathara
katuwur, masucian, mapepadan, ngaturang pujawali
miwah nyineb.
2. Tengeran tedun ngayah : kalih tulud lambat.
3. Tengeran ngurungang patedunan : Tigang klentungan
lambat.

Pawos 23

- (1) Kulkul Desa utawi Banjar tan wenang katepak yan tan
sangkaning pituduh Parajuru, sejawaning tengeran
kepancabayan.
- (2) Sang nepak kulkul tan sangkaning pituduh, patut
digelis atur supeksa maka buatan panepake, yan tan
mangkana, wenang sang mamurug keni pamidanda manut
perarem.

PALET 4

INDIK PARUMAN

Pawos 24

(1) Paruman/Sangkepan ring Desa Adat Belong luwire :

1. Paruman Desa/Banjar/Subak kawentenang :

a. Nyabran ngesasih, makacihna tanpa arah-arrah,
dwaning sampun panemaya manut perarem
soang-soang.

b. Napkala (Padgatakala) maka jalaran kulkul
entenang manut tatujon.

2. Sangkepan Banjar kawentenang nangken Anggara Wage,
Subak rahina Buda Wage.

3. Sangkepan Kerama Desa kawentenang nangken rahina
Anggara Kasih.

4. Sangkepan Parajuru Desa/Banjar/Subak kawentenang
manut wiguna.

5. Sangkepan Sekeha-sekeha kawentenang manutin
babuat.

(2) Paruman Desa utawi Banjar madudonan sekadi ring sor :

1. Prasida lumaksana risampun katedunin antuk sang
patut ngamiletin, kemanggalain antuk tengeran
kulkul, saha abusana sergep tur nyungklit, tan
kalugra makta kekaryan sambilan sakaluwire.

2. Tan maren ngarcana ring Ida Bhagawan Penyarikan
maka sarana Widhi Widana Cane.

3. Maserana antuk Janggi maka pengawit kelaksanayang
penyacak sep-sepan saha kelanturang antuk nyacak
dedosan gung alit manut perarem.

4. Tan kayogya ngawetuaken swara gora utawi byuta, yan hana mangkana keni pamidanda beya pecamil kadi dandaning nguman-uman ring sabha.
 5. Pamutus babawos beriuk sepanggul (Ingkup) punika sane kamanggehang.
 6. Sehananing--bebawos sane sampun kaputusalang ring paruman mewastu wenten silih tunggil kerama ngucapang pamutus peparuman punika nenten patut, wenang wong inucap kaninin pamidanda pecamil kadi dandaning ngumanuman ring sabha.
- (3) Prade daging paruman punika nenten kaingkupin, Mangda Parajuru Desa ngutsahayang ngilikang bebawose, saha pamutusnia mangda kararemin antuk I Kerama Desa, bilih tan prasida kasungkemin jantos ping tiga, wenang I Prajuru nunasang ring Sang Rumawos.

Pawos 25

- (1) Sajeroning paruman Desa, Bendesa patut nambiakang pamargin pangentere, pamekas nganinin indik :
 1. Ngunjuk lungsur pekraman saha ayah-ayahan, sulur artha berana padruwean Desa miwah sane lian-lianan.
 2. Rencana Parajuru nganinin indik usaha Desa kapungkur ipun.
- (2) Pamutus paruman Desa sinanggeh perarem maka pamitegep Awig-awig.

Pawos 26

- (1) Paruman Parajuru Desa kawenangania wantah ngerincikang pengerencana usaha Desane kapungkur.

- (2) Paruman Parajuru Desa tan kawenang ngamedalang tategenan ring I Kerama Desa sadereng kaingkupin sajeroning sangkepan Desa.
- (3) Pamutus paruman Parajuru Desa sane mawiwit pituduh Sang Mawangrat, taler kasinanggeh paswara.
- (4) Paruman Parajuru kawentenang sanistane ngenem sasih apisan bilih-bilih kengin padgata manut wiguna.

Pawos 27

- (1) Pasangkepan sekeha-sekeha kawentenang ngesasih utawi padgatakala manut tatujon wigunania soang-soang.
- (2) Nangken sangkepan sekeha patut atur supeksa rihin ring parajuru Desa utawi Banjar mangda prasida tan lempas ring patitis Pawos 5 (lima) ring ajeng.

PALET 5

INDIK DRUWEN DESA

Pawos 28

Padruwen Desa Adat Belong kawentenan ipun sekadi ring sor:

- (1) Kahyangan luwire : Pura Desa Bale Agung, Pura Puseh, Pura Dalem, Pura Sakenan, Pura Bedugul lan Pura Dukuh.
- (2) Bale Banjar asiki.
- (3) Bale Patemon asiki magenah ring jaba Pura Puseh Belong.
- (4) Pekarangan Desa Makatah 32 karang.
- (5) Setra asiki
- (6) Palaba Pura marupa carik magenah ring :

1. Subak Taro No. 50 a.n Laba Pura Belong ppno : 343
persil 16 sp. Klas II luas 0, 270 Ha.
Wates-wates
Ring Purwa : Carik I Dunung
Ring Daksina : Jelingjing
Ring Pancima : Margi
Ring Utara : Carik I Wayan Kesiari
2. Subak Taro No : 50 a.n. Laba Pura Belong ppno. 343
persil 26 sp. Klas II luas 0,250 Ha.
Wates-wates :
Ring Purwa : Carik I Gampil
Ring Daksina : Carik I Gampil
Ring Pancima : Carik I Botoh
Ring Utara : Carik I Liyu.
3. Subak Belong No : 199 a.n Laba Pura Puseh Belong
ppno : 37 persil 13 Klas II luas 0,025 Ha.
Wates-wates :
Ring Purwa : Tegal
Ring Daksina : Carik I Kuus
Ring Pancima : Carik I Lunga
Ring Utara : Carik I Salin
4. Desa Belong No: a.n. Laba Pura Puseh Belong
ppno : 107 persil 11b Klas III luas 0.715 Ha.
Wates-wates :
Ring Purwa : Setra
Ring Daksina : Tegal I Kuus
Ring Pancima : Carik.
Ring Utara : Tegal I Salin.

(7) Lelangon mekadi unen-unen lan ilen-ilen luwire :

1. Gong.
2. Angklung.
3. Barong Ketet.
4. Baris Tumbak.
5. Baris Pendet.
6. Rejang Lilit.
7. Rejang Oyod Padi
8. Calonarang miwah sane lian-lianan.

Pawos 29

- (1) Prajuru Desa wenang ngetangang pangupon-upon Laba Pura lan sapanunggilan padruwean Desane.
- (2) Pikolih lan Upon-upon Laba Pura inucap kaanggen prabea piodalan saha wewangunan ring Pura.
- (3) Nyabran pasangkepan Desa, Bendesa/Kelihan patut nguningayang pariindikan munjuk lungsur padruweane ring I Kerama Desa/Banjar.
- (4) Sakalwiring padruwean Desa/Banjar patut wenten ilikitanian.
- (5) Tan kalugra ngadol utawi ngesahang padruwean Desa yan tan kasungkemin antuk I Kerama Desa/Banjar.

PALET 6

SUKERTA PAMITEGEP

KARANG TEGAL LAN CARIK

Pawos 30

- (1) Kerama Desa pengamong Karang Desa, patut ngewatesin karang inucap antuk pagehan/turus utawi tembok mangde pakantenania asri.

- (2) Wates sisi kaler miwah kanger kakaryanin antuk sang ngemong karang inucap, reh punika mewasta gegaleng kaluwan.
- (3) Prade karasayang pagehan/Turus inucap ngelikadin, yan sami arsa penyandinge, kenger watese ngangge pinget kewanten.
- (4) Perade wenten karang kabebeng, patut kautsahayang olih I Parajuru mangden wenten pemargin ipun.

Pawos 31

- (1) Tegal miwah carik patut magaleng ring genahe soran.
- (2) Wates carik miwah tegal kenger ngangge pagehan, yan kaprasida mangda ngangge balok beton saking Kantor Agraria.

Pawos 32

- (1) Sinalih tunggil Kerama Desa/Banjar tan kalugra :
 - 1. Ngalah-ngalah margi, karang ayahan Desa, tegal miwah carik.
 - 2. Ngalah-ngalah tanah tegak Kahyangan, setra miwah sekancan tegak sane kasinanggeh suci.
- (2) Prade wenten melaksana kadi munggah ring ajeng inucap (1), angka 1 keni pamidanda manutin perarem saha ngewaliang sane kealahang punika miwah prade manut (1) angka 2, sejawaning keni pamidanda kadi ring ajeng, taler mawuwuh keni upakara pamarayascita sane matetujon ngewaliang kesucian tanah inucap.

Pawos 33

- (1) Sinalih tunggil Kerama Desa tan kalugra ngadol wiadin ngantahang pakarangane utawi tanah Desa, riantukan tanah punika kebanda antuk ayahan.
- (2) Karang wiadin tanah Desa punika dados kaserahang ring anak lian kemawon sang nerima paserah punika yogya nerima ayahan sekadi patut ipun.
- (3) Silih tunggil Kerama Desa sane celed ring ayah wenang katiwakin pamidanda manutin paswara. Yaning jantos awarsa celed ring ayah miwah pawedal nenten sangkaning panugrahan Parajuru Desa, wenang karang wiadin tanah Desa punika kadaut olih I Kerama Desa.

PEPAYON

Pawos 34 +

- (1) Ngawit nandur pepayonan tanem tuwuh sukat ipun nenten kirang ring adapa agung (1,5 meter) ngajeroang saking wates. Prade wenten jantos ngalintangin wates wenang kasepatgantungin.
- (2) Yaning wenten tetanduran ngungkulin mewastu mayanin kapisaga patut sang kaungkulin digelis ngewara antuk paiguman selantur ipun prasida sang nruwenang taru punika digelis ngebah utawi notor.
- (3) Prade sampun kewara taler tan wenten usaha sang nruwenang wit taru punika, sang rumasa katetehan/kajerihan wenang masadok ring Parajuru, tur sesampun kaparitetes yukti sekadi pangeloke, wenang I Parajuru ngandikayang mangda sajeroning tigang rahina

wit taru punika kakawonang. Yan sang madruwe tiwal ring pamutus Parajuru, wenang sang katetehan utawi kejerihan ngaonang wit taru punika saha ngambil tarunia..

(4) Sane keni pamidanda penyangaskaran saha prabea manutin perarem mekadin ipun :

1. Sang nruwenang wit taru sinanggeh mayanin, prade pungkak ngerubuhin wewangunan anak tiwos.
2. Sang notor, munggul wiadin ngebah taru prade pungkak tur ngerubuhin padruwean anak tiwos.

(5) Prabeya penyangaskaran, inggih punika :

1. Yan kemargiang sajeroning tigang rahina, kengin antuk ayam Brumbun asiki sakadulurania.
2. Yan langkungan ring tigang rahina patut kamargiang antuk mancasata.
3. Sehananing sane karubuh/karusak patut kabecikang malih olih sang ngarubuh/ngarusak.

WEWANGUNAN

Pawos 35

(1) Yan pacang mapewangunan patut :

1. Masadok ring Parajuru, yan prade wewangunan punika nganinin wates.
2. Ngangge sukat Asta Bumi miwah gegulak Asta Kosali sanitania manut ring Patitis niskala.
3. Tan kayogya nyayubin kapisaga.

(2) Prade wewangunan punika jantos nyayubin bilih-bilih tembok ring telenging wates, risampun kewara taler nenten karinguang mewastu indik punika ngelantur kasadokang ring Parajuru wenang sang madruwe

wewangunan punika keni pamidanda manutin perarem saha tembok inucap kegubar utawi sanistane mangda kekaryanang abangan.

WEWALUNGAN

Pawos 36

- (1) Warga Desa sane meliara saluwiring wewalungan patut sayaga nitenin negul utawi ngelogor mangda nenten ngarusak karang utawi pabianan Kerama tiwos bilih-bilih jantos ngeranjing ngeletihin Kahyangan.
- (2) Prade wenten wewalungan malumbar wiadin ngeleb ngarusak pakarangan/pabianan kerama tiwos risampun kewara taler nenten karinguang, kengin walungan punika kataban. Sang madruwe wewalungan punika keni pamidanda ngewaliang sane karusak miwah naur panebas wewalungan sane kataban punika manutin paswara. Yan sang madruwe wewalungan punika nenten mrasidayang nebas, wenang walungan punika kadebre antuk sang naban.
- (3) Prade jantos ngaletihin genah sane patut kasuciang minekadi Pura, Pemerajan/Sanggah miwah sane lianan, risampun kaparitetes antuk Parajuru wenang sang nruwenang wewalangunan punika kakaninin pamidanda artha lan pamarayascita manut paswara.

BHAYA

Pawos 37

- (1) Sane kasinanggeh bhaya luwire : Jiwa bhaya, Artha bhaya, Geni bhaya, Duracara ring agama.

- (2) Sang manggihin sahanan Jiwa bhaya patut nepak kulkul bulus anut pawos 22 (2).
- (3) Prade ring Desa kahanan Jiwa bhaya, patut I Kerama Desa ngaturang pemerayascitan manutin paswara tur sang mayanin katur ring sang ngawewenang.

Pawos 38

- (1) Sang manggihin kehanan Artha bhaya (Kemalingan) patut digelis nepak kulkul anut ring pawos 22 (2), utawi sang kemalingan atur supekta ring Parajuru Desa sane nyandang nimbangin ngelantur nguningayang ring sang rumawos.
- (2) Yaning wenten jatma ngeranjing ring pakubon wiadin pakarangan anak lian rikala suwung, mewastu sang madruwe karang kaicalan wenang jatma punika katuwekang, yan tan minangken wenang katiwakin Dewa Saksi ring Pura manutin Paswara.
- (3) Mangda tan katuwekang manut ring ajeng, asing-asing ngeranjing ring kubon anak lian patut :
 1. Matengeran suara (makaukan)
 2. Nyantos sang nruwenang karang gumentos rawuh utawi masadu ring pangapitnyane sane pinih tampek, maka buatan pengeranjinge.
 3. Pamedal karangnia kadagingin sawen, makecihna wenten pangarah rikalaning suwung.

Pawos 39

- (1) Warga Desa sane kaicalan/kemalingan prade pacang maseserep nunas kebebasan miwah panuntun ring Kelian Banjar.

- (2) Prade genahe maseserep ngelangkung ke Banjar tiwosan, patut nunas kebebasan utawi uwak-uwakan ring Kelian Banjar irika mangda tatacarane maseserep manut kadi drestane.

Pawos 40

- (1) Sehanan Warga Desane prade polih nuduk barang sakaluwire mangda atur uninga ring Kelihan Banjar.
- (2) Kelihan Banjar nyobiahang barang dadudukan punika mangde sang nruwenang sida mewali ngamolihang padruweannyane. Sang mariang^kenin patut nyidayang nyinahang mungguing barang inucap gumanti padruweannyane.
- (3) Prade jantos tigang sasih tan wenten anak ngelingin, wenang katur ring sang meraga Guru Wisesa.

PENYANGGARAN DESA/BANJAR

Pawos 41

Penyanggran kerama Desa/Banjar rikala ngawentenang karya suka-duka luwire :

- (1) Prade ngawentenang Panca Yadnya sane mabuwat.
- (2) Ngerombo tan pasangu sekatah ipun wantah ping tiga; selangkung ipun patut katuran pangu.
- (3) Pangu rikala Pitra Yadnya, keanutang ring abot dangan yadnyannyane, perade saking semeng jantos wengi, katuran pangu ping kalih.

SARGA IV

SUKERTHA TATA AGAMA

PALET 1

INDIK DEWA YADNYA

Pawos 24

(1) Palinggih panyiwian sane wenten ring wewidangan Desa Adat Belong.

1. Kahyangan Tiga : Pura Desa/Bale Agung, Pura Puseh, miwah Pura Dalem.
2. Pura Pengangon
3. Pura Ulun Swi
4. Pura Taman Sari
5. Pura Dukuh
6. Pura Pasiraman
7. Pura Sakenan
8. Pura Prajapati

(2) Rahina Piodalan sowang-sowang Kahyangan inucap kadi ring sor :

1. Pujawali ring Pura Puseh lan Desa kawentenang ping kalih sajeroning amasa inggih punika :
 - a. Pujawali Kapat kawentenang rikala Purnama sesampun wusan mawinih/ngurit.
 - b. Pujawali Kapitu kawentenang rikala Purnama sesampun pantune mayusa sakirang ipun asasih.
2. Piodalan ring Pura Dalem kawentenang ring Buda Wage Warigadean.
3. Piodalan ring Pura Pengangon kawentenang ring rahina Tumpek Uye.

Pawos 43

(1) Ring soang-soang Pura inucap patut kawentenang Pemangku.

(2) Ngadegang Pemangku, Kubayan lan Penyarikan Pura manut dudonan :

1. Nyanjan utawi Masembung, mapiteges mapitunas ring ajeng Penataran Pura wiadin ke Pura Desa menawi ring Balian Konteng lan sapenunggilania.
 2. Turunan utawi Ngewaris.
 3. Kapilih antuk I Kerama Desa melarapan antuk ngaturang sedah lelekesan sane silih tunggil ring sajeroning lelekesan punika medaging pinget sane kabuatang (Pemangku miwah Penyarikan Pura). Saha upakara sergep sesampun kapiuning raris keambil olih soang-soang Kerama. Sane ngeniang lelekesan madaging pinget sane kabuatang punika wantah sane keadegang.
- (3) Tan wenang kaanggen Kubayan, Pemangku miwah Penyarikan Pura luwire :
1. Cedangga
 2. Naen ngelaksanayang "SAD ATATAYI"
 3. Sang sapasira ugi sane tan kapatutang manutin perarem.
- (4) Prabea Kapemangkuan, maka miwah Penyarikan Pura luwire:
1. Adikasa Widhi (Ngawintenang) kamedalin saha kelaksanayang olih sang ngadegang (Kerama).
 2. Riwekas yan prade Pemangku, maka miwah Penyarikan Pura seda, wenang sang ngadegang sane kayogya ngawedalih saha muputang upakara lan upacaraania sami. Nanging wirangnyane ring kulawargan Pemangku, maka miwah Penyarikan punika taler kawenang ngelaksanayang upacaraania.

Pawos 44

- (1) Pemangku lan Kubayan ngenterang upacara piodalan ring Kahyangan utawi ring soang-soang paumahan.
- (2) Yan perade Pemangku lempas ring sesana miwah dharmaning kepemangkuan wenang katiwakin pamidanda manutin paswara.
- (3) Prade silih tunggil Pemangku inucap kapiambeng utawi cuntaka kengin nyelang Pemangku tiwosan. Yan tan wenten Pemangku, wenang Bendesa ngemargiang Pujawali.

Pawos 45

- (1) Pemangku, Kubayan miwah Penyarikan kagentosin riantukan :
 1. Seda.
 2. Pinunas ngeraga menawi kageringan lan sepenunggilania.
 3. Kausang antuk Kerama riantukan lempas ring sesana miwah dharmaning kepemangkuan.
- (2) Prade Pemangku, makamiwah Penyarikan Pura kawusang sangkaning melaksana asta dusta keni paminda manut perarem saha ngewaliang prabea pawintenane nguni.

Pawos 46

Kasukertan Kahyangan mekadi ring sor :

- (1) Tan kelugra ngeranjing ke Pura luwire :
 1. Sang Katiben Catur Cuntaka, minekadi sebel saking ngeraga :
 - a. Sebel kandel/ngeraja sewala selami dereng mabersih.

b. Sebel madruwe putra selami :

- Kulawarga sajeroning pekarangan gumentos kepus odel.

- Yayah lan kulawargania sajeroning apoan 12 rahina.

2. Makta sehanan barang sinanggeh ngaletihin.

3. Sato agung sajawaning rikala mapepadan.

4. Mabusana tan patut kadi tatacaraning ngeranjing ke Pura.

5. Sadereng polih uwak-uwak (Pituduh) jurun Desa.

(2) Pari polah sane tan kawenang ring Pura :

1. Masumpah (Cor) sejawaning pituduh jurun desa

2. Makebotan/makoratan, mewarih, masenggama, makolem dados asiki lanang wadon, nyangsang busananing wong, matutang wastra lan pusungan, marebat/mejaljal, ngopak, mamisuh manusu wong rare.

(3) Sang mamurug kecaping ajeng keni pamidanda pamerayascita manutin paswara.

Pawos 47

(1) Yaning wenten anak kerawuhan ring Pura kengin kapintonin melarapan antuk kedagingin geni baha kau-kau sepenginang suwenia ring pangkonania, yan prade rumasa kesinangsayan. Yan tan wyakti wong inucap kerawuhan wenang kekaninin pamidanda manutin perarem.

(2) Prade ring Kahyangan kehanan durmanggala minekadi kepancabhaya Pemangkunia patut digelis nyadokang ring Parajuru mangda marumang Keramania tur ngawentenang pamerayascita sepatutnia.

PALET 2

INDIK RESI YADNYA

Pawos 48

- (1) Sejawaning Pemangku, sang pacang madeg Pandita utawi Pinandita minekadi Balian Konteng, Dalang sakeluwiring jagi ngenterang yadnya patut mesadok ring Bendesa miwah ring Parisadha Hindhu Dharma.
- (2) Parajuru patut ngawas nitenin tur naweng ngalangin prade wenten kacihnan sasar kakecap miwah dresta, tur sareng nyaksinin upakara saha nyarwakang ring paruman Desa tegap rawuhing wates kawenangania ngenter yadnya.

Pawos 49

- (1) Pemangku patut ngeriyinang upacarane ring wawidangania soang-soang sesampune punika puput wawu dados muputang ring genahe lianan.
- (2) Kerama Desa sami patut sareng ngawas nitenin katuntun atuk Parajuru mangda sahanan yadnyane sane kawentenang kaicen pamuput olih Pinandita manut kawenangania soang-soang.

PALET 3

INDIK PITRA YADNYA

Pawos 50

- (1) Pemargin Pitra Yadnya madudonan manut sekadi ring sor:
 1. Upakara mapendem/sinuruping siti, utawi mapendem ring geni.
 2. Upakara makingsan ring geni/pertiwi.
 3. Upakara atiwa-tiwa (Ngaben/Palebun)

- (2) Upacara riwusan Ngaben/Palebon kelanturang antuk upacara upacara Ngerorasin Lan Nyekah/Ngasti.

Pawos 51

Swadharman lan tategenan rikala wenten sinalih tunggil Kerama kelayusekaran :

- (1) Sang Kaduhkitan patut :

1. Nyadokang ring Kelian Banjar tur nunas tetimbang kawentenania.
2. Ngaturin I Kerama Banjar gerombo mekarya eteh-ete sarwi kadulurin penyanggra canang (Base) sasidan.

- (2) Swadharmaning Kelihan Banjar :

1. Kelihan Banjar maritetes pemargin sang keduhkitan napike pacang kapendem, makingsan utawi ngelantur keabenang.
2. Prade pacang kapendem, makingsan utawi keabenang, pangeriyin I Kelian Banjar patut nunasang indik dudonan pemargi utawi padewasane ring Jro Kubayan, sesampune tinas raris wawu katepakang kulkul matutin pawos 22 (3) 2 olih I Kelian Banjar utawi Petajuhnia.

- (2) Penyanggran I Kerama Banjar selanturnia yan parade mapendem utawi makingsan inggih punika :

1. Beras alumur
2. Jinah manuting perarem
3. Ngaryanin upacara lan eteh-ete sawa.
4. Ngater ka Setra gumentos puput mapendem utawi mage seng

- (4) Tan kengén ngalelet langkungan ring tigang rahina sejawaning Pemangku Kahyangan Tiga lan Penyarikan Pura.
- (5) Tan kengin nginepang bangbang sane jaga angge mendem sawa.

Pawos 52

ATIWA-ATIWA

- (1) Atiwa-tiwa utawi ngaben kelaksanayang antuk :
1. Nyawa Resi utawi Nywasta Geni
 2. Sawa Prateka
- (2) Pamargin Atiwa-tiwa mekadi ring sor :
1. Sajeroning tigang masa wenang ngewangun wantah apisan, sakemawon yaning wenten mapendem langkungan ring amasa patut katiwakin tirtha pangentas.
 2. Yaning Pamangku Kahyangan Tiga lan Penyarikan Pura wenang kemargiang petatiwan satunggil seda, tan wenang pinendem.
 3. Sudonan patatiwan ngawit saking wawu seda utawi ngulapin, ngeseng jantos pangiriman.

Pawos 53

Patus lan penyanggran Banjar :

- (1) Pawedal patus saking I Kerama Banjar inggih punika :
1. Beras patus keanutang ring katah/kidik kakedengan Banjare riantukan punika keangge penyanggran Banjar.
 2. Ayam (pitik) manuting paswara.
 3. Gesing mauting paswara.
- (2) Kekaryan sane dados amongan I Kerama Banjar :

1. Eteh-eteu upacara lan upakara sawa
2. Wadah lan Patulangan.
3. Ngater ka .Setra saha ngelaksanayang sehananing karya sane wenten kilitan ipun ring petatiwan inucaping ajeng gumantos puput.

Pawos 54

Pangungun Banjar :

Mungging pengingu ring I Kerama banjar wantah keanutang ring abot dangan kekaryane saha taler keanutang ring paswara.

PALET 4

INDIK MANUSA YADNYA

Pawos 55

- (1) Manusa Yadnya inggih punika upakara-upakara dharmaning manusa ngawit saking patemoning kama petak kelawan kamabang sajeroning garba jantos seda.
- (2) Upakara kadi ring ajeng madudonan sekadi ring sor :
 1. Duk sang kamareka medal
 2. Kepus Odel
 3. Roras rahina
 4. Tutug Kambuhan (42 rahina)
 5. Tigang sasih
 6. Pawetuan (Oton/Odalan) 6 sasih.
 7. Metatah/Mapandes.
 8. Mawiwaha/Nganten
 9. Mawinten.
- (3) Upakara inucap manut nista madia lan utama sane tan maren keanutang ring kecaping sastra agama lan Catur Dresta.

PALET 5
INDIK BUTHA YADNYA

Pawos 56

- (1) Butha Yadnya inggih punika upakara pabeakala ring bebuthan.
- (2) Upakara ring sarwa perani luwire :
 1. Ring sarwa tumuwuh rikala Tumpek Pengatag (Saniscara Kliwon Wariga).
 2. Ring sarwa ingon-ingon rikala Tumpek Kandang (Saniscara Kliwon Uye)
 3. Upakara Pekala-kalaan manusa manut wiguna kabawos Pabyakala.
- (3) Upacara Pabyakala ring pertiwi, kahyangan lan bebuthan kewastanin Mecaru.
- (4) Pecaruan inucaping ajeng nista, madia, utama manut wiguna mekadi ring sor :
 1. Eka Sata
 2. Panca Sata
 3. Panca Sanak
 4. Resi Gana
 5. Panca Kelud
 6. Tawur Agung miwah sane lian-lianan.
- (5) Sajeroning sane munggah ring ajeng taler kawentenang upakara :
 1. Ngejot/Mesaiban utawi Yadnya Sesa nyabran wusan ngerateng
 2. Mesapuh-sapuh rikala pacang wali ring pura.

Pawos 57

(1) Nangken ngewarsa rikalaning Tilem Kesanga kawentenang upacara Tawur Kesanga sane dudonan ipun mekadi ring sor :

1. Ring pangelong ping 13 Ida Bhatara sami katuran Melis/Melasti . ke Segara utawi ring pemedal tirtane lianan.
2. Yan prade ring rahinane inucap ring ajeng sedek rahina pasah, pelastiane punika kemargiang ring rahina Tileming Kesanga ketah kabawos Ngarupuk makacihna pacang mapag rahina Panyepian benjangne.

(2) Upacara Penye pian sane kemargiang antuk I Kerama Desa Adat Belong luwire :

1. Amati Geni, tan kengin meapi-api.
2. Amati Karya, tan kengin nyambut karya.
3. Amati Lelanguan, tan kengin maoneng-onengan, masuara gora lan sepenunggilania.
4. Amati Lelungan, tan kengin medal saking puri utawi umahnia soang-soang.

(3) Bebratan inucap kemargiang saking semeng jantos benjang semeng/ndag surya raris kasuarayang kulkul makacihna pengembak.

(4) Sang amurug kecaping ajeng keni pamidanda manut perarem kemargiang antuk Patelik (Pecalang Desa).

(5) Riwus rahima Nyepi (Benjangne) makacihna pengawit Icaka Warsa patut soang-soang warga Desa maturan ring Merajan ngelantur Masimakrama.

PALET 6

INDIK CUNTAKA LAN SENGKERNIA

Pawos 58

(1) Cuntaka sangkaning seda/padem :

1. Yan dereng makupak :

- a. Sang kaduhkitan ngawit saking wawu lampus jantos 12 rahina saking padewasan mapandeme.
- b. Kerama Banjar ngawit saking lampus jantos 3 rahina saking padewasan mapandeme.

2. Yan sampun makupak :

- a. Sang Kaduhkitan ngawit saking lampus jantos 42 rahina saking padewasan mapendeme.
- b. Kerama Banjar ngawit saking wawu lampus jantos 12 rahina saking padewasan mapendeme.

3. Yan sang sampun makupak ngelantur keabenang utawi ngewangun :

- a. Sang kaduhkitan ngawit saking wawu lampus utawi yaning ngawangun ngawit saking wawu ngariyinin ngoreng sanganan sane jaga keangge upakara patetiwan punika jantos 12 rahina saking padewasan pangutangane turing sesampune ngemargiang upakara Panyeeban.
- b. Karema Banjar ngawit saking wawu lampus utawi yaning ngawangun ngawit saking wawu ngeriyinin ngoreng sanganan sane pacang keangge upakara patetiwan punika jantos 3 rahina saking padewasan pangutangane turing sesampun ngemargiang upakara pangebuan ring Kahyangan.

36
(2) Cuntaka/sebel sangkaning ngerajasewala/campur :

1. Sane keni cuntaka wantah deweknia tunggal, penganggenia lan genahnia aturu.
2. Suwenia sekantun ngamedalang rah, diastu sampun wusan ngamedalang rah yan prade durung wenten 3 rahina tur dereng mabersih taler kantung kasinanggeh cuntaka.

(3) Cuntaka/sebel sangkaning madruwe putra :

1. Yayah Renania, Rarenia, Kulawargania sajeroning paumahannyane lan Umahnia.
2. Suwenia Cuntaka :
 - a. Sang Yayah lan kulawarga sane wenten sajeroning karang paumahan gumentos kepus odel.
 - b. Renaning rare akambuhan (42 rahina) tur sesampun maparayascita.
 - c. Yayah lan kulawargania tunggil apaoan 12 rahina.

(4) Cuntaka/sebel sangkaning karuron :

1. Sakirang ipun 12 rahina tur sesampun maparisudha.
2. Deweknia, Somahnia, Umahnia lan penganggenia.

(5) Cuntaka/sebel sangkaning Perabian :

1. Sang merabian saha genahnia
2. Suwenia gumentos kemargiang upacara Pasakapan.

(6) Cuntaka/sebel sangkaning Gamia Gemana :

1. Sang melaksana (lanang istri) lan Desa Adat.
2. Suwenia gumentos kepalasang tur keprayascita deweknia, Desa Adat lan Kahyangan sami sane magenah sajeroning Desa Adat Belong.

(7) Sebel sangkaning salah timpal :

1. Sang melaksana lan Desa Adat

2. Suwenia gumentos sang melaksana maperayascita ring segera miwah ngamargiang pamerayascitan jagat (Desa Adat Belong).

(8) Beling Daha :

1. Sang beling saha genahnia aturu.
2. Suwenia gumentos mabiakawonan tur ngamargiang pamerayascitan ring Kahyangan.

(9) Babinjat :

1. Meme lan pianaknyane.
2. Selami dereng wenten mamas pianaknyane lan mrayascita deweknyane (meme lan pianaknyane).

(10) Mitra Ngalang :

1. Deweknia makakalih (lanang istri) lan genahnia aturu.
2. Selami gumentos maprayascita.

(11) Melaksana Sad Tatayi :

1. Deweknia nunggal
2. Gumentos maprayascita
3. Nenten kangkat dados Pandita miwah Pinandita.

(12) Gering Ila:

1. Gumentos waras.
2. Dewek lan penganggenia.

PALET 7

INDIK SASARADAN

Pawos 59

Sajeroning ngambil kekaryan sane mabuat, bilih-bilih sane muatang pangerombo sane katah, kawenang nyarad kulawarga Desa Adat, sakemawon keanutang ring agung alit kekaryane. Silih tunggil kekaryan sane kawenang nyarad warga Desa

/Banjar inggih punika rikala ngawentenang Panca Yadnya, ngingsirang umah, gelebeg/lumbung miwah sane lian-lianan sane kasinanggeh mabuat inggih punika :

(1) Sajeroning ngemargiang patatiwan wenang nyarad :

1. Kerama Banjar sami lanang istri rawuhing Taruna-taruni lan robania sami.
2. Kerama Banjar sami lanang istri lan Sekeha Taruna-Taruni.
3. Kerama Banjar sami lanang istri.

(2) Sajeroning ngemargiang Panca Yadnya taler keanutang ring sor singgih yadnyane sane kamargiang saha pinunas sang madruwe yadnya lan panyanggrania.

(3) Nyarad rikalaning ngingsirang umah, gelebeg/kerumpu miwah sane lian-lianan taler keanutang ring abot dangan kekaryane tur panyanggrania.

SARGA V

SUKERTA TATA PAWONGAN

PALET 1

INDIK PAWIWAHAN

Pawos 60

(1) Pawiwahan inggih punika patemoning purusa predana malarapan panunggalan kayun sukacita kadulurin upasaksi sekala lan niskala.

(2) Pelaksanaan pawiwahan luwire :

1. Pepadikan kemanggalain antuk Pakrunan
2. Ngerorod, ngrangkat rihin wawu kakrunayang,
3. Nyeburin riantukan wadone manggeh sentana rajeg.

(3) Padabdab sang sane pacang mawiwaha patut :

1. Sampun manggeh Deha Taruna (Prasida nganutin Undang-Undang).
2. Sangkaning pada rena (tan kapaksa)
3. Nganut kecaping Agama (tan gamia gamana)
4. Kawisudayang (Sudi Wadani) prade pengambile tiwos agama miwah kapatiwangi.

(4) Pamargin pawiwahane mangda taler nganutin Undang-Undang Perkawinan saking sang ngawiwenang.

Pawos 61

(1) Pawiwahan sane kepatutang ring Desa Adat Belong sekadi ring sor :

1. Sampun kamargiang pabyakalan utawi pasakapan kesinaksiang ring sekala niskala antuk pinandita.
2. Wenten saksi Parajuru sane ngilikita sang mawiwaha.
3. Sampun matengeran suaran kulkul.

Pawos 62

Tata polahe marabian patut ipun sekadi ring sor:

(1) Sapasira ugi pacang ngewarangang pakulawarga patut masadok ring Parajuru, selanturnia juru punika mapitetes manut tan manut kecap parabiane.

(2) Pamargin pepadikane anut dudonan :

1. a. Kapertama antuk sedah sejangkepnyane maka tatakan pakrunan.

- b. Kaping kalih taler antuk sedah saha polahe makadi ring luwur sakemawon maweweh antuk canang sesantun lan ajuman maka tatakan atur piuninge ring sanggah kemulan wadune, yan prade pakrunane sampun katerima antuk kaluwarga wadune.
- c. Kaping tiga polahe taler pateh sekadi sane kaping kalih sakemawon upakran ipun malianan inggih punika ngangge upakaran pejati matetujon mejatiang sang kakrunayang mepamit ring Bhatara-Bhatari lan Dewa Hyangnyane.
- Ngawit saking rahina punika sang kakrunayang nenten kanton kakuwub antuk kulawargania, duwaning sampun keambil antuksang meraga purusa.
2. Selantur ipun risampun rawuh pedewasane raris kelanturang antuk upacara pawarang-warang.
3. Upacarane sane pinih untat mantuka ring kaluwarga wadune wenten sane mewasta mararapan utawi megagapan inggih punika antene lanang wadon saha katututin antuk kulawargania budal kaumah wadune pecak saha makta rarapan merupa anaman bantal sane pacang kawehin kaluarga wadune saha canang daksina ajuman sesantun lan jauman sane jaga katur ring sanggar kuluarga wadune.

(3) Prade ngerorod/Ngerangkat patut :

1. Reraman lanange ngawentenang pamilaku malarapan antuk duta sekirangnia 2 (kalih) diri mamidartayang ring reraman wadune sane kerangkatang.
2. Pagenahan antene tan kengin ring dunungan/paumahan sang lanang sadereng mabyakala.

(4) Sajeroning pakrunan/pangelukuan patut :

1. Kemanggalain antuk geng sinampura ring reraman wadune.
2. Keiguman bawos antuk pakedih utawi kapelagayang arep ring pasewakan sang ngedih saha dewasa pewartangne riwekas.
3. Kacihnayang indik kapurusane prade wadune keajegang, dados kapatut lanange sane kaedih kabawos pawiwahan Nyeburin.
4. Prade pamepelepehe tan katerima, pakrunane taler kamargiang jantos ping tiga selantur ipun pewartangane manggeh kamargiang.
5. Pakerabkambean mapiteges upacara tinas apadang (Puput)mapikuren duwaning manut sekadi : Sajeroning Kebawos ambe kelaksanayang ring sekala niskala antuk serana jauman miwah Widhi Widana ;
 - a. Jauman, pinaka ngambe/ngadungang kayun soang-soang pakulawargan wadune.
 - b. Widhi Widana Pejati, satmaka mejatiang sajeroning niskala nunas wadune ring pamerajan Kamulania.
 - c. Ngaturang Widhi Widana Pekandelan ring Pura Puseh matatuwek mangda kalugra mekandelin Ida Bhatara saha dados munggah ring Bale Agung saha kesaksinin olih Parajuru.

PALET 2

INDIK NYAPIAN

Pawos 63

- (1) Perabiane /Pakurenane prasida kawusang melarapan antuk palas silih tunggil padem/seda.
- (2) Palas perabiane wenten kalih pawos inggih punika sangkaning pada lila miwah mawiwit wicara.
- (3) Sang ayat palas merabian patut atur supeksa rihin ring sang rumawos (Pengadilan Negeri) risampun tinas apadang pamutuse kabawos nyapian wawu I Parajuru nyarwakang kawentania ring desa saha kekaninin panebas kulkul manut perarem.

Pawos 64

Tatacara palas merabian sangkaning pada lila sekadi ring sor :

- (1) Pegunakayan polih pahan pada
- (2) Pabekel/tadtadan soang-soang kewawa niri-niri, warisan kewawa antuk sang manggeh purusa.
- (3) Nyekolahang miwah ngupapira pratisentana manut swadharmaning guru rupaka patut kelaksanayang olih Guru rupaka /purusa.
- (4) Nawur pamidanda penebus kulkul manut paswara.

Pawos 65

Prade riwekas sang palas kacihnan adung malih patut :

- (1) Ngelaksanayang pawiwahan malih.
- (2) Keni pamidanda nikel saking palase, wit palase pecak sangkaning pada lila.

Pawos 66

(1) Sang balu kabinayang dados kalih :

1. Balu istri wit sentana (Sentana Rajeg) miwah Balu istri boya sentana.
2. Balu Lanang kapurusa (wit sentana) miwah Balu Nyeburin (Boya sentana).

(2) Swadharmaning Balu patut inucap :

1. Ngamanggehang patibrata tan kengin malaksana paradara utawi dratikrama.
2. Nguasayang waris, pagunakayan, tan dados ngadol, ngadeang, makidihang lan sane tiwosan sejawaning saking kebebasan wekania utawi kulawargania sane pinih tampek saking purusa yan prade wekania kantung alit-alit.
3. Kengin ngedih sentana prade wenten pidadab sadurung sinalih tunggil lampus saha kabebasan antuk kulawargania sane kasinanggeh kapurusa.
4. Kawenang malih mawiwaha prade wenten kabebasan anut angka 2 ring ajeng.

Pawos 67

Balu kaucap tan pageh sekadi ring sor :

- (1) Paradara/Dratikrama.
- (2) Matilar saking pakubon tan masadok jantos 6 sasih.
- (3) Lempas ring swadharma sewos-sewosan, tan prasida ngehehin solah maprakerti arep ring pituduh kulawarga purusa.

PALET 3

INDIK SENTANA

Pawos 68

- (1) Sentana wenten tigang pawos sane kaucap Pretisentana Lanang, Pretisentana wadon (Rajeg) miwah Sentana Paperasan.
- (2) Pretisentana inggih punika : sentana sane metu saking pawiwahan kepatut.
- (3) Prade pawiwahane tan patut ngawetuang sentana mangda tan kanton kewastanin babinjat utawi astra yogya kemanggalain antuk penyangaskaran.
- (4) Prade pawiwahane tan ngawetuang sentana kengin ngedih sentana antuk upasaksi sekala niskala kewastanin sentana paperasan saha saking kulawarga sane pinih nampek pakilitan ipun, pamekas sane saking purusa Yan tan wenten saking purusa kawenang saking wadon miwah saking sane lianan.

Pawos 69

- (1) Ngadegang sentana manut dudonan patut maserana antuk upakara pamerasan saha kasinaksiang ring sekala niskala.
- (2) Sapasir ugi I Kerama sane pacang ngedih sentana patut masadok ring Bendesa sanistan ipun asasih sadereng pamerasan.
- (3) I Bendesa kasuksukin antuk I Kelian Banjar mangda digelis nyarwakang ring wewidangan Desane sang sapasira ugi rumasa tan lila mangda digelis nyadokang

masengker kalih wuku sadereng pamerasan.

(4) Jurun desa digelis mawosin saha ngicenin pamutus nepek ring Catur Dresta miwah perarem.

(5) Prade sulur paperasane tan manut ring kecaping ajeng, Jurun Desa wenang ngandeg sang pacang mameras saha ngicenin pamutus mangda kaputusan rihin bebawose sulur utawi wicarania.

Pawos 70

(1) Paperasane sane sampun kebawos patut ring Desa Adat Belong inggih punika :

1. Ngelaksanayang Widhi Widana paperasan.
2. Kesinaksiang antuk jurun desa.
3. Kejarwakang ring wewidangan Desane.

(2) Sane kapatutang keangge sentana sekadi ring sor :

1. Nginutin agama Hindu
2. Papernahan nedunang saking sang meras.
3. Kulawarga saking purusa prade tan wenten, kengin saking wadu yaning taler tan wenten wawu kengin saking anak lianan.

(3) Kengin ngadegang sentana langkungan ring adiri lanang wiadin wadon.

(4) Kang sinanggeh warisan luwire :

1. Duwe tengah mekadi : Tegal/Carik, Karang ayahan Desa, Kahyangan.
2. Pamerajan/Sanggah.
3. Pagunayakan, tadtadan /jiwadana, hutang piutang muang sane lianan.

(5) Wawu kengin kebawos warisan prade wenten :

1. Sang mapiturun (Pewaris).
2. Katurunan (Akhli waris)
3. Artha berana miwah tategenan (Ayah-ayahan) makcihna warisan.

Pawos 71

(1) Sang kasinanggeh warisan luwir ipun :

1. Pretisentana purusa.
2. Pretisentana predana (Sentana rajeg)
3. Sentana paperasan lanang/wadon.

(2) Prade tan wenten sekadi ring ajeng kang sinanggeh waris inggih punika :

1. Turunan purusa pernah mungguhahang mekadi rerama misan mindon.
2. Turunan purusa pernah kesamping mekadi keponakan misan mindon.

Pawos 72

Swadharmaning waris patut :

- (1) Nerima saha ngutsahayang tetamian pahan saking keluhurania mekadi Merajan/Sanggah, Pura saha pangupakarania miwah nyeledihinin ayah-ayahan pewaris.
- (2) Ngabenang pewaris saha ngelanturang upacara-upacara Pitra Yadnyania.
- (3) Nawurin hutang-hutang pewaris manut pangelokika.

Pawos 73

Pangepahan warisan manut, sekadi ring sor :

- (1) Risampun kelaksanayang upacara Pitra Yadnya lan hutang-hutang pewaris buntas sami ketawur.
- (2) Para waris polih pahan artha berana lan ayah-ayah pada-pada kemawon ayah-ayahnia kengin magenti-genti.
- (3) Sinalih tunggil waris kengin tan polih pahan prade :
 1. Nilar kawitan lan sesananing agama.
 2. Alpaka Guru Rupaka.
 3. Sentana rajeg kesah mawiwaha utawi dados pretisentana nyeburin soang-soang kebawos ninggal Kedaton.
- (4) Boya dados waris taler polih upon-upon anut dudonan luwire :
 1. Sentana luh selami dereng kesah mawiwaha utawi tan alpaka guru.
 2. Balu Luh wiadin Muani Nyeburin (Soang-soang boya sentana).
 3. Mulih daha utawi Teruna riantukan ring pawiwahane pecak sampun kebawos ninggal sentana taler nenten kantun kasengguh sentana.
- (5) Pewaris kengin maweweh rikala maurip pinaka jiwa dana, tadtadan/bekel makacihna paweweh tetep ring pianaknia sane kesah mawiwaha.

(1) Prade ring sajeroning pakulawarga wenten waris langkungan ring adiri patut :

1. Kawentenang paiguman indik pedum waris inucap.
2. Yan tan prasida, katunasang tatimbang ring Parajuru kengin katumusang ring sang rumawos (Pengadilan Negeri)

(2) Prade jantos karang Desa kepah utawi kasepih patut soang-soang nedunin makrama Desa Ngarep taler kengin magenti.

(3) Prade karang inucap kaputungan patut Parajuru nibakang ring :

1. Sang sinanggeh waris manut pawos 73.
2. Sang kengin angge sentana manut pawos 71 (2) miwah (3).

3. Prade taler tan wenten cumpu ring panepas Kerta Desa kengin katumusang ring sang rumawos (Pengadilan Negeri).

SARGA VI

WICARA LAN PAMIDANDA

PALET 1

INDIK WICARA

Pawos 75

(1) Sane wenang mawosin mekadi mutusang wicara ring Desa inggih punika Jurun Desa sane kasinanggeh Kertha Desa.

- (2) Prade sang mawicara tan wenten cumpu ring sang rumawos desa Adat minekadi Kertha Desane kengin nunasang wicara inucap ring sang rumawos (Pengadilan Negeri).

Pawos 76

- (1) Sehanan wicara mawiwit kacorahan sakaluwir kasinanggeh nungkasin daging Awig-awig, Paswara miwah Perarem Desa/Banjar Parajuru patut digelis mawosin tan nyantosang pasadok.
- (2) Sejaba wicara sekadi ring ajeng patut nyantosang pesadok sang nunas babawos.
- (3) Panepase patut pastika nyantenang iwang patut melarapan Tri Premana (Saksi, Ilikita. Bukti) miwah tan maren nepek ring catur Dresta.

PALET 2

INDIK PAMIDANDA

Pawos 77

- (1) Desa/Banjar niwakang pamidanda ring warga Desa sane sisip.
- (2) Patiwak inucap kelaksanayang olih Bendesa/Kelihan banjar.
- (3) Bacakan pamidanda luwire :
1. Ayahan panukun kasisipan.
 2. Danda Artha (Dosa, danda saha panikel-panikelnia miwah panikel-panikel paturunan)
 3. Rerampagan.
 4. Penyangaskara.

- (4) Pamidanda sane katiwakang patut masor singgih manut ring kasisipania.
- (5) Jinah utawi raja berana pamidanda punika ngeranjing dados druwen Desa/Banjar.

PALET 3

INDIK RERAMPAGAN

Pawos 78

- (1) Kerama sane langkungan ring tigang paruman ngelantur tan nawur paturunan miwah dadendan wenang kerampag.
- (2) Polahe ngerampag tatacaran ipun sekadi ring sor :
 - 1. Kelaksanayang antuk Juru kesarengin antuk Kerama Desa seakeha tigang diri maka saksi.
 - 2. Sang ngerampag sangkaning darsana ngambil barang utawi nyawenin tanem tuwuh akehnia manut ring pengargan hutang sang kerampag.
 - 3. Parajuru miteketang mangda barang-barang sane kerampag digelis katebus masengker awuku ring kutus rahinane pacang keadol.
 - 4. Tan nganinin saluwir barang sane patut kainggilang manut Agama miwah mademang pangupajiwan sang karampag.
- (3) Prade sang pacang kerampag ngewara (Ngalangin) diastu sampun tan nganutin Awig-awig Desa Adat Belong punika wenang karang Desa sane kagenahin kedaut antuk I Kerama Desa.
- (4) Pamidanda inucap ring ajeng sami buntas risampun sang kakaninin :

1. Nunas geng pengampura ring Kerama Desa riantukan nguak pasubaya (Perarem).
2. Nawur pangargan penguak pasubayan duk pacang kerampag kadulurin antuk prayascita penyapsap kaiwangan ring Desa.

PALET 4

INDIK PECAMIL

Pawos 79

Sehananing rancangan/bebawos utawi kekaryan sane sampun kemanggehang tur kaingkupin ring paruman olih I Kerama Desa/Banjar mewastu wenten silih tunggil Kerama sane ngucapang rancangan bebawos utawi kekaryan punika nenten patut, wong inucap kekaninin pamidanda pecamil manutin paswara.

SARGA VII

PERAREM LAN PASWARA

Pawos 80

- (1) Paruman Desa utawi Banjar patut ngamedalang Perarem-perarem anggeang mategepin Awignia nunggal-nunggal manut dudonan.
- (2) Daging sehanan perarem patut saeloan ring daging Awig-Awig.
- (3) Sane patut kaunggehang ring perarem minekadin ipun :
 1. Dewasa ngawitin kasobiahang daging Awig-awig lan sane mabuat.
 2. Rerincikan bacakan daging Awig-awig sane mabuat.
 3. Agung Alit Pamidanda panikel-panikel lan selantur ipun.

4. Tatasulur ngemargiang daging Awig-Awig.
5. Sehanan indik sane siwosan sane wenten kilitanipun
maka pamitegep daging Awig-Awig punika.

Pawos 81

Paruman Parajuru tan maren patut :

1. Saeloan ring daging Awig-Awig lan Perarem-perarem.
2. Manut ring Adat, Agama, Sastra Loka miwah Desa
Dresta.
3. Pastika nyantenang Agung Alit pamidandania yan
kapurug.

SARGA VIII

NGUWAH-NGUWAHIN AWIG-AWIG

Pawos 82

- (1) Nguwah-nguwahin Awig-awig Desa puniki kelaksanayang
antuk paruman Desa.
- (2) Awig-awig puniki kemargiang ngawit kaingkupin
(Keraremin).

Pawos 83

- (1) Sakaluwiring sane pecak sampun naen wenten patut
keanutang ring daging Awig-awig puniki.
- (2) Sekaluwiring sane durung kaunggahang sajeroning
Awig-Awig puniki patut kelaksanayang manut tatacara
sane sampun kadulurin antuk perarem-perarem.

SARGA IX

PEMUPUT

Pawos 84

Bandesa/Kelian Banjar Adat rikala ngemargiang daging
Awig-Awig miwah usaha Desa patut tan maren :

- (1) Saeloan utawi mawirasa ring sehanan Parajuru sane
taler nyarengin dados pangoreg warga desane minekadi
Kelian Banjar lan Pekaseh.
- (2) Ngawentenang galah mantuka ring warga Desa mangda
warga desane polih ngupadi pangupajiwa nincapang
pangeweruh miwah usaha niri-niri sewosan.

Pawos 85

- (1) Awig-awig puniki kasobiahang duk rahina Anggara Kasih
Dukut, titi tanggal ping 5 sasih Kapitu Icaka warsa
1941, Tanggal Masehi 2 Januari 1990, ring Jaba Pura
Puseh Belong.
- (2) Awig-awig puniki kalingga tanganin antuk Bendesa Adat
kasarengin antuk Kelian Banjar saha kesaksiang antuk
Kepala Desa Taro.
- (3) Luwir sang ngalinggatanganin :

1. Bendesa Adat Belong,

Sus
(-I Ketut Tingkes)

2. Kelian Banjar Adat Belong,

[Signature]
(-I Ketut Sampun)

[Signature]
Saksi
Kepala Desa Taro,
(-I Made Jaya)

Mengetahui

CAMAT TEGALLAANG



(I DEWA PUTU PARIWESA, BA.)

NIP : 600004825.-

MENGETAHUI DAN TELAH DICATATKAN

PADA TANGGAL :

N O M O R :

BUPATI KEPALA DAERAH, TINGKAT II GIANJAR

TJOKORDA GDE BUDI SURYAWAN.SH.